



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

MOELETSI OA BASOTHO

M5.00


PARARE DOMINO PLEBEM PERFECTAM

**Tšubuhlellano e
phahame litsing**

6

**Lesotho ha le
itheke moroalo**

7

**LI HOMELA LIKHOEBO
TSA 'MUSO**www.moeletsioabasotho.co.lsRe se re fumaneha ho
marangrangEmail: newsroom@moeletsioabasotho.co.ls
Tel: +266 28350466/ Whats app: 62600983

MOELETSI

Monna h'a bone habeli

Naha ea Lesotho ke setho sa mokhatlo oa SADC. Leha ho le joalo, lena le lilemo tse 12 kaofela le sa khetheloe boemo bofe kapa bofe kahar'a mokhatlo. 'Me mabaka a teng a neng a sitisa taba eo hore e phethahale, le hoja le ntse le lefa seabo sa selemo le selemo ho latela boitlamo ba lona.

A mang a mabaka ao a kenyeletsa bosieo ba botsitso lipolotiking le ho Litsi tsa Tšireletso nako e telelele, 'me 'mali ea khabane o tla hopola litaba tsena kaofela ha re ka hetla morao moo re tsoang teng. Rene re tsoara likhetho tse akaretsang re sa tsoa li tsoara hang kamora selemo feela, ka lebaka la ho hloka botsitso le ho tsoelana matla hose taolo le ho hlokelana tšepo ho baetapele ba nako eo.

Ke qalo ka puso ena e litulong hajoale hore e be ke mona re qeta lilemo tse hlano re e-s'o ee likhethong leha e le tsa tsome feela, 'me hona hore monna ha bona ha baeli, etsoe ngoan'a cheleng o tšaba mollo. Naha ea Lesotho e ke ke ea hlola e khutlela kahar'a qhafutso eo. Nako e fehile joale, sechaba sa Basotho se ile sa ikelelitsa hore ho fihla moo se khathetseng ke likhetho kamor'a selemo le selemo, 'me taba eo ka bo eona ene e nyotobetsa moruo oa naha kakaretso.

Re utloa e le boiteko bo khotatsang hore Naha ea Lesotho joale ke nako ea hore le eona e ke iketele se seng sa litulo ho mokhatlo oa SADC. Naha e tlhile molomong oa SADC, ka lebaka la lerato la naha, botšephehi, bophethahatsi, ke tse ling tsa litšia tsa hore e be naha e mona moo e teng kajeno. Boikitlaetso bona bo bontša khohlo lipolotiking.

Lefatše e se le motsana morao tjena ka lebaka la marang-rang, 'me bophelo bo t'l'o nolofala haholo. Re shebile khoebo le ho fokotsa litšenyehelo esita le ho ntlafatsa tikoloho ea ho etsa khoebo. Re thoholetsa LNSW ha e thakhotse sethala sena kahar'a naha. Ka hona se t'l'o thusa barekisi ba kante le kahare ho nha, ho kenya likopo tsa mangolo a tumello, lipolomiti tsa khoebo ka marang-rang sebakeng se le seng. Boitlamo bona ba 'muso ba ho theha tikoloho e loketseng khoebo, e t'l'o matlafatsa tlholisano ea likhoebo tsa lehae.

Bacha nako ea bona e fihlele joale, hore ba ke ba fumane monyetla oa ho hlalisa maikutlo a bona le litaba tse ba amang. Bacha ke sechaba sa kamoso, seo re tlamehang hore re tsetele ho sona haholo. 'Me ke hantle haele mona ba etsoe hloko ka ho thehloa setsi sa ntlafatso ea marang-rang, 'me taba ena e t'l'o shebana le bacha bohle, ba litoropong le metseng esita le ba alosang mehlape, e le hore melaetsa e fihle ho bona ka tsela e loketseng.

Bohlokoa bo bong ke ba hore ho t'l'o ba le puisano e bulehileng le ea 'nete, e le e 'ngoe ea litsela tsa ho sebetsana le tliekefetso ea bong, tšebeliso e mpe ea lithetefatsi le mathata a bophelo ba kelello har'a bacha. Ho fehile tlhokomelong ea hore Naha ea Lesotho e tobane le mefuta e fapakaneng ea tliekefetso, ho kenyeletsa tliekefetso ea 'mele le ea maikutlo, haholo-holo har'a banna le basali ba lilemong tse tlase.

Bacha ba heso sebelisang monyetla, hobane ke molomong oa lona. Ntho ea lona ke eo phutholohang le hlalisa maikutlo a lona a matle e seng a senyang kapa a hlohloletsang meferefere.

'Muso oa Lesotho o tšoare ka thata ho potoloha le naha ka bophara, ho bona hore o lokisa boemo ba likoloi tsa baeti. Ke likhao tse ka bang tharo kaofela tse t'l'o phethetloa haufinyane, moo bahoebi joale le bapalami ba t'l'o imona monoana. Ke setereke sa Thaba-Tseka, Berea le Mafeteng moo tšebetso ena e makhetha e t'l'o phetheloa.

Taba ea bohlokoa ke hore hohle boemelo bona bo kenyeletsa motebo oa sepolesa, liofisi tsa 'masepale, mabenkele, matloana a boithuso le likamore tse ngata haholo bakeng sa bakerisi, le hore hape joale a tširelelitsoe bakeng sa lipula le letsatsi ho bapalami. E se e le hore litaba tsena tse ntle lianela litereke tsena kaofela, le sechaba re lumela hore joale se tla boloka tikolo e hloekile.

MOLIMO A BOLOKE LESOTHO LE BASOTHO

Bahoebi ba imona monoana

Nthabeleng Seithleko

Tona-Kholo Samuel Ntsokoane Matekane, o khotsofalitsoe ke tsoelopele ea khaho ea setsi se secha sa likoloi tsa baeti Teyateyaneng, a re ho lebelletsoe hore setsi sena se phetheloe le ho nehelanoa sechabeng nakong ea likhoeli tse peli tse tlang.

O buile tsena ka la 24 Phato monongoaha, nakong ea ketelo ea ho lekola mosebetsi oa khaho ea setsing sena, moo a ileng a hlaloha tsoelo-pele ea morero.

bakeng sa batho ba sebelisang setsi sena.

O itse sebaka sa litekisi se se se batla se phethetsoe, ho setse feela mosebetsi oa ho betla tsela, 'me mosebetsi oohle o setseng o lebelletsoe ho phethoa nakong ea likhoeli tse peli.

Ho sa le joalo, Setho sa Paramente sa Teyateyaneng, Mohlomphehi Lebona Lephema, o itse sebaka seo pele e ne e le sa sehlopha sa bolo ea maoto sa Lioli, pele Lekala la Puso ea Libaka, hammoho le Lekhotla la Teyateyaneng, li thusa ho se fetola setsi sa litekisi.

O itse motebo oa sepolesa o ne o ntse o le teng sebak-

eng seo ka nako e telele, empa se se se ntlafalitsoe e le karolo ea morero ona.

Lephema o itse setsi se secha sa litekisi se tla fa bahoebi sebaka se sireletsehileng sa ho rekisa, kaha ba tla khona ho boloka thepa ea bona ka polokeho kahar'a likamore tseo. A re bapalami ba se ba tla fumana moo ba isireletseng lipula le letsatsi.

O boetse a re setsi sena se na le sebaka sa libese se ka amohelang libese tse pakeng tsa tse tharo le tse 'ne.

Morero ona o lebelletsoe ho ntlafatsa polokeho le boiketlo ba bakhanni ba lipalangoang, bahoebi le bapalami ba sebelisang setsi sena.



O itse o tseba hore morero ona o ile oa lieha ka lebaka la maemo a neng a le kaholimo ho matla a mokonteraka, empa a bontša khotsofalo ka boitlamo ba mokonteraka ba ho phethela mosebetsi o setseng nakong ea likhoeli tse peli.

Tonakholo o itse ketelo ena e tsamaisana le boitlamo ba hae ba ho tsoa ofising le ho ithahlobela tsoelo-pele ea merero e ntseng e etsahala likarolong tse fapakaneng tsa naha.

O boetse a etsa tlhahiso ea hore tsela e katiloeng setsing sena e khabisoa ka mebala ea sehlopha sa bolo ea maoto sa Lioli.

Rakonteraka ea ikarabellang ka morero ona, Molefe Nthabane, o itse setsi sena se na le motebo oa sepolesa, likamore tse 64 tsa bahoebi, liofisi tsa 'masepala, mabenkele, sebak sa litekisi le matloana

57396597
28 350 815

28 350 466
lesaoanat@gmail.com

Malebela

Scan me

U se u ka fumana buka ea Malebela ho marang-rang a boletsoeng ka tlase kapa oa sebellisa code e kaholimo.

"Get the Akello app on Play Store, App Store, or Huawei App Gallery for Mazenod books and more. Download now!"

<https://library.akello.co/downloads>

akello

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLING (LUKE 1:17)

EMAIL: editor@moeletsiobasotho.co.ls

sub-editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seithleko

Tšelisio Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

Litsela tsa khoebo li ea batalatsoa

Nthabeleng Seitlheko

Muso oa Lesotho o thakhotse festere ea sechaba sa Lesotho ea khoebo (LNSW), e leng sethala sa marang-rang se reretsoeng ho nolofatsa mekhoe ea khoebo, ho fokotsa litšenyehelo tsa khoebo le ho ntlafatsa tikoloho ea ho etsa khoebo.

Sethala sena se thakhotsoe ka la 24 Phato monongoaha ke Lekala la Khoebo le Ntlafatso ea Khoebo ka morero oa lona oa Competitiveness and Financial Inclusion (CAFI) Project, e tšehelitsoeng ka lichelete ke Banka ea Lefatše.

LNSW e thusa barekisi ba kantle le ba kahare ho naha, hammoho le baemeli ba bona, ho kenya likopo tsa mangolo a tumello, lipolomiti le mangolo tse amanang le khoebo ka marang-rang, sebakeng se le seng. Sena se fokotsa tlhoko ea hore barekisi ba tsamaee ho tloha lefapheng le leng la 'muso ho ea ho le leng.

H'a bua moketeng oa thakholo, Letona la Khoe-



bo le Ntlafatso ea Khoebo, Mohlomphehi Motlatsi Mapelepo, o itse mohato ona o bontša boitlamo ba 'muso ba ho theha tikoloho e loketseng khoebo le ho matlafatsa tlholisano ea likhoebo tsa lehae.

O itse tebello ke hore marang-rang ana a fokotsa nako ea ho sebetsana le likopo le moralo oa tsamaiso, ha a ntse e ntlafatsa katleho le ponaletso khoebong ea machaba.

Letona le khothalelitse makala le mekhatlo ea

'muso e seng e hokahane le sethala sena, ho se sebelisa ka botlalo le ho tsoela pele ho sebelisana ho ralla mathata a ka hlahang nakong ea tšebetso.

Mapelepo o itse makala le mekhatlo e 12 ea 'muso e se e hokahane le morero ona, 'me e se e tlahile ntlafatso ea katleho mosebetsing.

Leha ho le joalo, o itse ho ntse ho e-na le liqholotso haholo-holo mabapi le mekhoe ea ho lefa. O hlalositse hore 'muso o ntse o ntšets-

apele ka ho lefisa ha bonolo 'me e tla hokahanngoa le marang-rang ho nolofatsa litefo.

O boetse a totobatsa tlhoko ea hore ho thehoe moralo o nepahetseng oa molao o tla laola tšebetso ena, kaha hajoale tšebetso ea eona e tataisoa ke tumellano ea kutloisiso lipakeng tsa mekhatlo e nkang karolo.

Motsamaisi e Moholo oa CAFI Chaba Mokuku, o itse LNSW ke mohato oa bohlokoa ntlafatsong

ea tikoloho ea khoebo le matsete kahar'a naha.

O hlalositse hore sethala sena se lumella barekisi ho kenya tlhahisoleseling le litokomane tse hlophisitsoeng ka tsela e tsoanang, sebakeng se le seng, e leng se ba nolofalletsang ho phethahatsa litlhoko tsa molao mabapi le ho kenya thepa, ho romela thepa kantle le ho tsamaisa thepa e fetang kahar'a naha ntle le ho etela mekhatlo e mengata.

O itse LNSW ke karolo ea morero o pharaletseng oa 'muso oa ho ntlafatsa tikoloho ea khoebo, o kenyeletsang lintlafatso tsa ngoliso mangolo a likhoebo le lichelete, litefo tsa lekhetho le khoebo e tšelang meeli.

K'omishenara oa Pokello ea Lekhetso Lesotho(RSL), Rakokoana Makoa, o itse thakholo ena ke mohato o moholo oa ho ntlafatsa tsamaiso ea khoebo, le ho matlafatsa tšebeliso ea marang-rang ho ntlafatsa phano ea litšebeliso.

Ho ea ka Makoa sethala sena se tla potlakisa boikamahanyo le litlhoko tsa molao, se ntlafatse ho nepahala ha lintlha le ho fana ka ponaletso le bonnete bo boholo ho barekisi. Hape se tla thusa 'muso ho matlafatsa boikamahanyo le ho bokella lekhetho le meputso ea 'muso ka katleho.

O ekelitse ka hore thakholo ena ha se pheletso ea liphetoho empa ke qalo, kaha ho sa hlokahala mosebetsi o mongata ho atolosa mekhoe ea litefo tsa marang-rang, ho hokahanya mekhatlo e meng le ho matlafatsa moralo oa molao le tsamaiso ea ka marang-rang.

E mong oa bahoebi Lebese Mochelanyane, o itse barekisi ba ke ntse letsoho ntšetso-peleng ea litaba tsena 'me ba se ba ntse ba bona melemo ea eona.

O itse marang-rang ana a lumella barekisi ho etsa likopo tsa litokomane neng kapa neng, 'me ba fumane thuso ho liofisiri tsa 'muso ha ho hlaha mathata a kahar'a tšebetso ea ona.

O tšepisitse hore barekisi ba tla tsoela pele ho tšehetsa LNSW, a re sethala sena se na le bokhoni ba ho ntlafatsa haholo tikoloho ea khoebo Lesotho.

LNSW e lebelletsoe ho thusa ho fokotsa nako ea ho lokolla thepa le litšenyehelo tsa khoebo, ho eketsa ponaletso le tlholisano, hammoho le ho tšehetsa katoloso ea lihlahisoa tse romeloang kantle ho naha le kopanyo ea khoebo tikolohong ea Afrika.

Basali ba sireletsehe-Mofolo

Nthabeleng Seitlheko

Ha palo ea batho ba sebelisang marang-rang Lesotho e ntse e eketseha, mekhatlo ea sechaba e re naha e lokela ho tiisa mekhoe ea ho sireletsa basali le bana khahlanong le tliekefetso e etsoang ka mecha ea puisano ea marang-rang, hobane ho atisa bolokolohi ba basali le banana ba boikemelo le ho ipuella. Tsena li boletsoe ke Mothehi le motsamaisi oa Mokhatlo oa Centre for Development Social Justice Motlatsi Mofolo, puisanong le Koranta ena, ka la 26 Phato monongoaha.

O hlalositse hore mafapha a fapakaneng a toka,

tšireletso le tšireletso ea bana h'a lokela ho sheba litaba tsa tliekefetso ea marang-rang e le taba e sa lokelang ho fella feela ho Child and Gender Protection Unit (CGPU), kapa lipuisano le khalemo.

Mokhatlo o re moo ho fumanoang bopaki ba hore motho o entse tlole ea molao, taba e lokela ho lateloa ka mehato e nepahetseng ea molao, e le ho fana ka tšireletso ho bahlatsipa le ho thibela ba bang ho pheta liketso tse tsoanang.

Taba ena e tla nakong eo lipalo tsa naha li bontšang hore tliekefetso khahlanong le basali e ntse e le bothata bo boholo. Lintlha tsa Lesotho Demographic and Health Survey (DHS) 2023/24 li bontša hore 41% ea basali ba lilemo li 15-49

ba kile ba hlekefetsoa 'meleng ho tloha ba le lilemo li 15, athe 15% ba kile ba hlekefetsoa ka thobalano.

UNFPA Lesotho e boetse e qotsa lintlha tse bontšang hore hoo e ka bang 44.1% ea basali ba lilemo li 15-49 ba kile ba ba le boiphihlelo ba tliekefetso ea 'mele kapa ea thobalano ho tloha ba le lilemo li 15.

Empa mekhatlo ea sechaba e re tliekefetso ha e sa lokela ho utloisisoa feela e le e etsahalang malapeng, sechabeng kapa libakeng tsa sechaba. Ka lebaka la ho ata ha marang-rang, e se e ka etsahala le ka marang-rang ka ho hlekefetsa, ho tšosa, ho nyefola kapa ho sebelisa litaba tsa motho ntle le tumello.

'Afrobarometer' e fumane hore 53% ea Basotho ba bona tliekefetso khahlanong le basali e le ntho e atileng metseng ea bona. Ho feta moo, 56% ba re ho ka etsahala hore mosali a nyatsuo kapa a hlekefetsoe ha a tlaheha GBV ho ba boholong. Ho ea ka mekhatlo ea sechaba, lipalo tsena li bontša bothata bo boholo. Haeba basali ba bang ba se ba tšaba kapa ba tsilatsila ho tlaheha tliekefetso e etsahalang metseng.

Mahlatsipa a fue sebakeng se sireletsehileng sa ho tlaheha linyeoe, hore mapolesa a be le bokhoni

ba ho sebetsana le bopaki ba marang-rang, le hore melao e teng e sebelisoa ka nepo moo liketso li seng li oela tlas'a litlole tsa molao.

Ka hona ha Lesotho le ntse le ata lefatšeng la marang-rang, tšireletso ea basali le bana e tlamela ho hola hammoho le marang-rang. Ha bopaki bo fumaneha, sechaba se batla tsamaiso e netefatsang hore linyeoe lia fuputsoa, mahlatsipa a sireletsoa, 'me batho ba tlolang molao ba tobana le toka.

Har'a litaba tse ling ke tsa sekhahla se phahameng sa basali le banana ba qosoang ka ho siha bana khrehloa, ho ba lahla, ho ba bolaea, 'me liketsahalang tsena ho bonahala basali le banana ba har'a sekhobo ba le bang, ho sa bonahale banna ba nka boikarabello kapa bahlankana. "Ke nako ea hore basali le banana ba sireletsehe ka ho feletseng, banna ba nkeloe likhato le bahlankana ha ba ameha litlole tse joalo tsa molao.

O re ba qholotse hile kaha tloaelo ea khale ea ho tima basali bolokolohi ba ho kenya letsoho litabeng tse ba amang, ba sa nyefoloe le ho ba le maikutlo, taba eo e khutlile, kaha basali le banana ba nyefoloe ka liaparo le lipuo tsa bona ha ba eo kenya letsoho litabeng tsa sechaba.



MOELETSI O TŠEHETSA BACHA

Tšeliso Thakholi

Thato Rantsi (26) oa Motimposo seterekeng sa Maseru ke e mong oa bahlahisi ba thepa ea boleng bo phahameng ea lepolanka, e kenyeletsang hara tse ling tse ngata litafole tsa metsi, litulo ka mefuta ea tsona liraka tsa maboteng, litafole le 'li-wardrobe' tsa maboteng. O boetse o lokisa ka makhethe a maholo thepa eohle ea lepolanka e senyehileng. Leeto lena la hae la ho ithehela khoebo ea ho betla mapalanka le qalile hang ho ba a phethele lithuto tsa hae tsa mosebetsi oa matsoho Sekolong sa Leloaleng seterekeng sa Quthing, moo a ileng a boela a ntlafatsa

litsebo tsa hae Sekolong sa LOIC seterekeng sa Maseru. Toro ea hae e kholo ke ho iphumana a ena le feme e kholo e etsang thepa eohle ea lepolanka, kaha sena se tla fokotsa chelete e ngata e rekang lihlahisoa tsa lepolanka kantle ho naha.

SESOSA KE TORO

Ke hotse ke ena le toro ea ho bona ka letsatsi le leng Naha ea Lesotho ka meru eo e nang le eona, e tseba ho hlahisa lipalo tsa majareteng le tsena tse sebelisoang bakeng sa ho kenya lithapo tsa motlakase metseng le litoropong. Empa e kholo ka ho fetisisa e ne e le ho bona naha e tseba ho itlhahisetsa mefuta ea lifate, tse tla etsa lepolanka bakeng sa ho etsa thepa eohle ea katlung. Ke qalile khoebo ena sesosa e ntse e le hore ke batla ho phethahatsa toro ea ka ea ho ba le lifeme tsa tlhahiso ea thepa ea katlung.

KAJENO

Kajeno ke ntse ke ntšetsapele toro eo ea ka, ka ho ba le khoebo ena e nyenyane e ntseng e hola, 'me re fumaneha ka Seteishining le Ha Foso seterekeng sa Berea, moo re etsang litafole tse ntle tsa metsi, libethe, 'li-wardrobe' tsa maboteng, litulo le thepa eohle ea katlung. Re boetse re ea li lokisa ha li robehile. Re qalile re le bahlano. Kajeno re se re le robeli ka litsebo tsa rona tse fapakaneng.

QALEHO

Ho ne ho se bonolo haholo empa tiisetso, lerato le ho hopola ho phethahatsa toro ea ka ke tsona tse ileng tsa etsa hore ke be matla ho feta. Bana beso, bao ke sebetsang le bona ba tseba hantle toro ea ka. Ke ka lebaka lena re tšoaraneng ka matsoho re le ntho e le 'ngoe ho fihlela toro ena. Mosebetsi ona oo reo etsang ha se oa ho fumana chelete feela khoeli le khoeli, empa ke ho bontša bacha ba bang ba habo rona hore

re ka iketsetsa, re sa e mele 'muso ho tla re fa mesebetsi ena e sieo. Le teng ha se bacha bohle re ka hiroang ke 'muso. Toro e qala ka se senyenyane seo mocha a nang le sona, e seng lintho tse mohlolo.

LERATO LA MOSEBETSI

Kamehla ha ke bona bethe kapa liraka tsa maboteng tse ntle ka ho fetisisa tse e ntsoeng ke rona, bareki ba rona ba khabisitse le ho beha lijana tsa bona ka makhethe, ke tlaloa ke thabo le lerato la mosebetsi oo keo e tsang. Lerato la mosebetsi oa ka le hola letsatsi ka leng ka lebaka la ho bona hore tšebetso eo re e tsang e fetola bophelo ba batho. Ho rona taba eo ke tlotla e kholo. Batho ba reka libethe ho rona, 'me ho ba le moo bana ba bona ba robalang teng. Taba eo ke tlotla e kholo ho rona. Ka mantsoe a mang lerato la mosebetsi oa ka le bakoa haholo ke

takatso ea ho thusa sechaba ka thepa ea boleng bo holimo e entsoeng Lesotho ke bana ba Basotho, ka boqapi le litsebo tse khethileng tsa ho betla le ho khabisa lepolanka.

TLHOKOMELISO HO BACHA

Bana beso, leha le kaba le mangolo ha feela le sena lerato la mosebetsi litaba tsena li fetoha le fela la mafela-felane. Ha le qeta sekolong le se ke la lula fatše, la emela 'muso hore o lefe mesebetsi. Empa ka litsebo tseo o nang le tsona o le mocha o ka fetoha tlhahiso ea mosebetsi. Ratang seo le se etsang ho ba Lesotho le hloka bacha ba tsebang ho itšoarela ka matsoho. Ke rata ho qetella ka ho le hlokomelisa hore le qale ho ithuta mesebetsi ea matsoho le sa ntse le le likolong tsa mathomo, kaha sena se tla le thusa hore le hole le se lentse le ena le lerato la ho itšoarela ka matsoho re sa e mele ho ea hiroa.



Bacha ba eloa hloko

Nthabeleng Seithleko

Letona la Likhokahanyo, Mahlale le Tšebeliso ea ona le Boqapi (MICS-TI), Mohlomphahi Nthati Moorosi, o re morero o se o ntse o tsoela pele oa ho theha setsi sa bacha sa ntlatatso ea marang-rang, se tla shebana le mathata le litaba tse amang bacha.

Letona Moorosi o buile sena ha a bua le bacha nakong ea UniPod Creative Challenge 2026 Agenda, e ntseng e tsoaretsoe Maseru, ka la 24 Phato monongoaha.

Ho ea ka Letona, setsi sena se lebeletsoe ho qala ho hasoa ho Se-ea-le moea pono sa Naha pele selemo sa 2027 se fela. Bacha ba tla fua monyetla oa ho hlalisa litaba tse ba amang, ho buisana ka tsona le ho batla tharollo ea mathata a bona.

'Matšosane Molibeli ea neng a emetse Lekala la Bohahlali puisanong ena,

o amohetse khopolo ena, a re katleho ea setsi sena e tla itšetleha haholo ka hore bacha ba nke karolo ka ho fana ka litaba.

O hatelletse hore litaba ha lia lokela ho shebana feela le bacha ba lulang Maseru, empa li lokela ho ela hloko le bacha ba libakeng tsa mahaeng, ho kenyeletsa le bacha ba alosang meh-

lape, e le hore melaetsa e fihle ho bona ka tsela e ba loketseng.

Puisanong ena ho boetsoe ha totobatsoa bohlokoa ba puisanong e bulehileng le ea 'nete, e le e 'ngoe ea litsela tsa ho sebetsana le tšekefetso ea bong (GBV), tšebeliso e mpe ea lithetefatsi le mathata a bophelo bo botle ba kelello har'a ba-

cha.

E mong oa bacha ba nkang karolo ho UniPod Creative Challenge 2026, Tšepo Mofana, o re o khethile bonono e le mokhoa oa ho fetisa melaetsa ea tšehetso ho bacha ba sa khoneng ho ithalosa.

Mofana o itse nakong ea ho hola ha hae e ne e le motho ea sa rateng ho bua

le batho haholo, e leng se ileng sa mo ama ka litsela tse fapakaneng.

Puisano ena e ne e tsamaisoa ke Dr. Jacqueline Olweya, Moemeli oa UNDP.

Litlaleho tsa Machaba a Kopaneng li bontša hore bacha ba Lesotho le bona ba tobane le mefuta e fapakaneng ea tšekefetso, ho kenyeletsa tšekefetso ea 'mele le ea maikutlo, haholo-holo har'a banna le basali ba lilemo tse pakeng tsa 18 le 24.



Lipolotiki li homela likhoebo tsa 'muso

Nthabeleng Seithleko

Ho kenella ha lipolotiki khethong ea litho tsa liboto tsa likhoebo tsa 'muso ho sitisa puso e ntle, boikarabello le tšebetso ea likhoebo tseo sechaba se itšetlehileng ka tsona. Sena se hlalile puong ea Motlati oa Molula-Setulo oa Boto ea Institute of Directors Lesotho, Nkareng Letsie, puisanong le Koranta ena, ka la 25 Phato monongoaha, kopanong e shebaneng le puso, boikarabello le tšebetso ea likhoebo tsa 'muso.

Letsie o itse khaello e phahameng ea mesebetsi Lesotho e bonahala e etsa hore lipolotiki li kenelle le likhethong tsa batho ba fuaang maemo a bohlokoa, ho kenyeletsa litho tsa liboto tsa likhoebo tsa 'muso.

O hlalositse hore boemo bona bo ka beha likhoebo kotsing haeba batho ba khethoa ho ipapisitsoe le likamano tsa lipolotiki ho fapana le tsebo, boiphihlelo le bokhoni bo hloahalang bakeng sa mesebetsi. O itse litho tsa liboto li lokela ho sebetsa molemong oa likhoebo le sechaba, eseng ho latela lithahasello tsa batho kapa mekha e itseng e ka 'nang ea ba khetha.

Letsie o re ho hira batho ka mabaka a lipolotiki mae-mong a hlohang boiphihlelo ho ka fokolisa boikarabel-

lo, kaha ho ka ba thata ho fumana motho ea ikarabellang ha khoebo e sa sebetse hantle kapa lichelete tsa sechaba li sa sebelisoa ka nepo. "Naha e lokela ho ikeletsa bocha, tabeng ea khetho ea batho ba fuaang boikarabello ba ho tsamaisa likhoebo tsa 'muso", a rialo. A totobatsa hore litho tsa liboto li lokela ho tseba hore li tla ikarabella bakeng sa tšebetso ea likhoebo tseo li li etelletseng pele.

O itse bothata bo bong bo boholo ke hore ha 'muso o fetoha, batho ba bang ba libotong ba ka tlosoa mae-mong ntle le ho sheba lipehelo tsa bona kapa katleho eo ba e fihletseng. Ho ea ka Letsie, ho felisa mokhoa ona ho hloka hore litho tsa liboto li khethoe ka boiphihlelo, tsebo le bokhoni, athe tšebetso ea tsona e lokela ho lekanyetsoa ka lipehelo tse hlakileng.

Ho latela lintlha tse hlalisoeng kopanong, 'Muso oa Lesotho o na le likhoebo tse tšeletseng tseo e leng beng ba tsona ka botlalo, ho kenyeletsa Banka ea Poso, WASCO, BEDCO, LEC, LNDC le LTDC. Ho boetse ho na le likampani tse 12 tseo 'muso o nang le karolo ho tsona, hammoho le tse 11 tseo LNDC e nang le karolo ho tsona, e leng karekare tso ea likhoebo tse 29.

Lekala la Lichelete le na le boikarabello ba bohlokoa

ba ho lekola puso e ntle, tsamaiso le tšebetso ea likhoebo tsa 'muso. Ka Hlakola 2026, Lekala le ile la phatlalatsa 'State-Owned Entities Fiscal Risk Report' ea selemo sa 2024, e she-



baneng le likotsi tseo likhoebo tsa 'muso li ka li bakelang mathata ka chelete ea naha.

Letona la Lichelete le Ntšetsopele ea Meralo Dr. Retselisitsoe Matlanyane, o itse likhoebo tsa 'muso ke matsoho ao 'muso o a sebelisang ho fana ka litšebeletso le ho phethahatsa merero ea ntlatatso ea naha. A re ka lebaka leo, 'Muso o lokela ho beha mesebetsi e hlakileng bakeng sa likhoebo tsona, ho beha linako le litekanyetso tsa ho lekanya tšebetso, le ho khetha batho ba nang le bokhoni hore e be litho tsa liboto.

Letona le boetse la totobatsa boikarabello ba sechaba ba ho netefatsa hore batho ba nang le bokhoni, boikarabello le boitšoarobottle ke bona ba behoang maemong a phahameng a

tsamaiso ea likhoebo tsa sechaba. Moemeli ea tsoang Tanzania Nchimunya Michelo, o itse likhoebo tsa 'muso ha li tsamaisoa ka nepo li ka theha mesebetsi le ho ntlatatso bophelo ba sechaba. A re ho bohlokoa hore batsamaisi ba likhoebo ba lumelloe ho etsa mesebetsi eo ba e abetsoeng ntle le ho kena-kenana le mesebetsi ea bona. O boetse a re katleho ea likhoebo tsona e qala ka ho hira batho ba nepahetseng le ho ba fa boikarabello bo hlakileng.

Michelo o boetse a ipiletsa ho mafapha a ame-

hang hore litaba tsa phetoho ea maemo a leholimo li kenyelletsoe mererong ea likhoebo, kaha phetoho ea maemo a leholimo e ka ama kholo le botsitso ba likhoebo.

Ka selemo sa 2025, naha ea Kenya, e ile ea fetisa molao o shebaneng le ho matlafatsa boikemelo, tsamaiso le boikarabello ba likhoebo tse tsamaisoang ke 'muso.

Kenya e boetse e na le komiti e nang le boikarabello ba ho eletsa 'muso litabeng tsa likhoebo tsa 'muso, ho kenyeletsa ho thehoa ha tsona le ho hlophisoa bocha ha tšebetso ea tsona.

Mehlala ena e ntlatatso taba ea hore Lesotho le lona le hloka mekhoea e matla ea ho sireletsa liboto tsa likhoebo tsa 'muso khahlanong le tšitiso e bakoang ke lipolotiki le ho matlafatsa boikarabello ba tsona.

Litaba tsena li hlalile kopanong e neng e tsoeroe ho tloha ka la 24 ho isa ho la 26 Phato monongoaha, e kopantseng litsebi le baetapele ba tsoang Lesotho, Zambia, Zimbabwe, Seychelles, Mauritius, Tanzania, Malawi, Eswatini, Namibia le Kenya.

Kopano ena e fana ka sethala bakeng sa linaha tsa Afrika ho arolelana boiphihlelo, ho bapisa mekhoea ea tsamaiso le ho batla litharollo tse ka matlafatsang tšebetso, botsitso le tlholisano ea likhoebo tsa 'muso.



Tšubuhlellano litsing e phahame

Nthabeleng Seitlheko

Lekala la Bophelo, ka Lefapha la Bophelo ba Kelello, le kopane le mafapha a fapakaneng ho sebetsana le mathata a tibileng a tsamaiso, khaello ea lisebelisoa le tšubuhlellano e tobaneng le setsi sa bakuli ba mafu a kelello, haholo batšoaruoa Le-sotho, tsena li bile ka la 25 Phato Monongoa.

'Moka o ne o shebane le tlhokahalo ea ho nchafatsa melao e laolang litšebeliso tsa bophelo ba kelello, kaha tsamaiso ea lipatlisiso tsa mafu a kelello e ntse e sebetsa tlas'a molao oa bophelo ba kelello oa 1963.

Motlatsi oa Motsamaisi oa Lefapha la Bophelo ba Kelello, Dr. Thabo Mokhothu, o itse tsamaiso ea bophelo ba kelello, haholo litšebeliso tsa lipatlisiso, li tobane le khatello e kholo, a re litlaleho tsa Monamoli tse hlahileng habeli li pepesitse boholo ba mathata a teng.

Dr. Mokhothu o hlalositse seboka sena e le pitso ea

hore ho nkoe khato, moo makhotla le lefapha la bophelo li lokelang ho sebetsa 'moho ho ntlafatsa mekhoe ea tšebetso, ho lumellana ka kutloisiso mabapi le bakuli bana ba tsoang Listing tsa Tlhabollo ea Batšoaruoa le ho netefatsa hore toka le tlhokomelo ea bophelo li fanoa ka seriti.

O itse palo e kholo ea mafapha e bontša botebo ba bothata, 'me tšebeliso no-'moho e ka thusa ho koala lekhalo pakeng tsa molao le bongaka, ho nchafatsa melao le ho sireletsa litokelo tsa batho ba tlókotsing haholo.

Motlatsi oa Mongolisi Lekhotleng le Phahameng, Adv. Tebello Mokhoema, o itse kaha makhotla a se a e-na le basebetsi ba lekaneng, a khona ho sebetsana le linyeoe tse ngata, e leng se entseng hore palo ea bakuli ba tsoang Litsing tsa Tlhabollo ea Batšoaruoa ba amoheloang e eketsehe.

O hlalositse hore bakuli ba bangata ba isoa tlhokomelong tlas'a tlhokomelo ea nakoana, moo ho fanoang ka matsatsi a pakeng tsa 14 le 21 ho fumana boemo ba

kelello ba motho.

Leha ho le joalo, o itse makhotla a na le meeli ea ho rarolla bothata bona, kaha litaba tsa bophelo ba bakuli li le tlas'a Lekala la Bophelo, athe makhotla a le tlas'a lekala le leng. Sena se thafatsa litaba tsa lichelete, ho kenyeletsoa khaho ea meaho e lekaneng ho fokotsa tšubuhlellano le ho netefatsa hore bakuli ba fumana tlhokomelo e hlokahalang.

Ha a hlalosa boemo ba Sepetlele sa Mohlomi, Medical Superintendent Dr. Hlophekile Tšita, o itse ho na le koluo la lefapheng la bakuli ba tsoang Litsing tsa Tlhabollo ea Batšoaruoa, moo tšubuhlellano e feteletseng e behang litokelo le polokeho ea bakuli kotsing.

O itse setsi sena se neng se etselitsoe ho amohela bakuli ba 36, hona joale se lula bakuli ba 86, e leng se bakang tšubuhlellano e feteletseng libakeng tsa bolulo le tsa ho jella.

Dr. Tšita o itse boemo bona bo fokotsa karolelano ea basebetsi le bakuli, bo theola boleng ba tlhokomelo 'me bo eketsa menyetla ea likohlano le mafu a tšoaet-

sanoang, ho kenyeletsoa le tšoaetso ea lintla.

O boetse a re ho lula sepetlele nako e telele ho ka etsa hore bakuli ba tloaele bophelo ba sepetlele haholo, ha boemo ba bona ba kelello le bona bo ka mpefala.

O hatelletse hore maemo ana a ama seriti sa motho 'me a hloka tlhokomelo e potlakileng, haholo-holo moo bophelo bo botle, toka le polokeho ea sechaba li kopanang teng.

Mokomishinara e Moholo oa Tlhabollo ea Batšoaruoa, Phoka Scout, o itse ho hlokomela batšoaruoa ba nang le mathata a kelello ho beha basebetsi le batšoaruoa ba bang kotsing, kaha ho ka ba le litlhaselo libakeng moo ho lulang bakuli ba mofuta oo.

O itse setsi se boetse se tobane le mathata a tsamaiso, a kang ho lieha ha linyeoe makhotleng le tiehiso ea ho fumana litlaleho tsa lingaka tsa kelello ho tsoa Lekaleng la Bophelo, le nang le khaello ea basebetsi.

O itse ho hlokahala hore ho eketsoe bokhoni ba litšebeliso kapa ho ahoe litsi tse ncha, kaha litsi li tobane

le tšubuhlellano e tšoenyang.

Leha ho le joalo, Phoka o hlakisitse hore tlas'a molao o teng, boikarabelo ba Tlhabollo ea Batšoaruoa mabapi le bakuli bana bo lekanyelitsoe haholo ho faneng ka tšireletso, eseng tlhokomelo ea bongaka kapa ho hlokomela litlhoko tsa bona tsa letsatsi le letsatsi.

Tseba boemo

ba hau u

alafshoe



Lesotho ha le itheke moroalo



Ho sa le joalo, Motsamai-si oa Kopano Lefapheng la Lichelete le Ntšetsopele ea Sechaba, Tieho Molise o itse Lesotho ha le na likoloto tse saletseng morao ho SADC, ebang ke litefello tsa selemo le selemo kapa lichelete tse hlokalahalang maemong a khethehileng.

O itse Lesotho le lefa SADC chelete e ka bang lidolara tse 2.4Millione selemo le selemo, 'me chelete eo e lutse e le boemong bo batlang bo tsoana lilemong tse ka bang hlano tse fetileng. O hlalositse hore leha tefo ea selemo le selemo e lula e tsitsitse, chelete ea maemo a khethehileng e ka fapana ho latela maemo a teng ka nako eo.

Sebaka sa bo-46 sa SADC, se ne se shebane le ho ntšetsa pele kopano ea linaha, ntšetsopele ea meralo ea motheo, phetoho ea temo le tšebeliso ea lihloiloeng tsa bohlokoa li ile tsa khetholloa e le lintlha tsa bohlokoa tse ka tsamaisang ntšetsopele ea moruo oa SADC.

Har'a liqeto tse ling, SADC e amohetse tumellano ea SADC Tourism UNIVISA, 'me ea kopa linaha tseo e leng litho ho potlakisa ho tena le ho tiisa litokomane tsa molao tsa SADC, tse retsoeng ho matlafatsa tšebeliso 'moho le kopano.

Lesotho le lona le bile har'a linaha tse tekeneng tumellano e fetolang karolo ea 33 ea tumellano ea SADC, e matlafatsang mehato e nkuoang khahlanong le linaha tse saletseng morao litefelloeng tsa tsona tsa SADC.

Nthabeleng Seithleko

Lesotho e bontšitse boikemisetso ba ho ba Motlatsi oa Molula-Setulo oa Lekala la SADC la Lipolotiki, Tšireletso le Tšebeliso ea Tšireletso, kapa ho nka setulo se tlang sa lekala lena. Kopo ena e lebelletsoe ho tšohloa sebokeng se ikhethang sa SADC se tla tsoaroa ka Mphalane monongoaha.

Ha a bua le bo-ralitaba, ka la 24 Phato monongoaha, Letona la Litaba tsa Machabeng Mohlomphehi

Limpho Tau, o itse Lesotho le hlahisitse ka molao thahasello ea lona ea ho nka boemo bona kamor'a seboka sa bo-46 sa SADC sa Marena le Lihlooho tsa Mabusu se neng se tsoaretsoe Durban, Afrika Boroa.

Tau o itse Mopresidente oa Afrika Boroa, Cyril Ramaphosa, o khethiloe ho ba Molula-Setulo oa SADC, ha Mopresidente oa Zambia a khethiloe ho ba Motlatsi oa Molula-Setulo. Morena Mswati III oa Eswatini eena o khethiloe ho ba Molula-Setulo oa Lekala la SADC la Lipolotiki, Tšireletso le Tšebeliso ea Tšireletso.

O hlalositse hore naha e tla khethoa ho ba Motlatsi

oa Molula-Setulo oa lekala lena kapa ho nka setulo se tlang e tla khethoa sebokeng se ikhethileng sa SADC ka Mphalane. O itse Lesotho ke e 'ngoe ea linaha tse bontšitseng boikemisetso, hammoho le Angola.

Tau o itse Lesotho le hopolitse SADC hore le qetile lilemo tse 12 le sa fuoe boemo bo phahameng ba boetapele kahar'a mokhatlo, ka hona nako e fihlile ea hore le fuoe monyetla oa ho etella pele. O itse sephetho sa taba ena se tla tsebahala kamor'a seboka se ikhethileng sa Mphalane.

Letona le boetse le itse le shebile litaba tsa boikarabello ba SADC ka hloko,

kaha le bile teng sebokeng sa SADC sa 2024, 'me la hlahloba litokomane tsa 2025. O itse Lesotho le 'nile la ba har'a linaha tse tharo ho isa ho tse hlano tseo kamehla li phethang boitlamo ba tsona ho SADC.

O itse SADC e boetse e tšehetsa lenaneo la liphetho tsa Lesotho, 'me naha e ntse e tsoela pele ka leeto lena ka tšebeliso 'moho le mokhatlo.

Tau o tiisitse hore puisano e ileng ea fanoa qetelong ea seboka sa SADC ke eona tokomane ea bohlokoa e bontšang liqeto tse nkiloeng ke mokhatlo, 'me e lokela ho sebelisoa ke bo-ralitaba ha ba tlaleha ka liqeto tsa seboka.

27 350 562 / 57396597 (whatsApp)
bookcentre@mazenodprinting.co.ls

Malebela

Mantšatlala

Mopheme

Sehloho sa liletholatsi

Lipapali tsa Basotho

SEBOPEHO-PUO SA SESOTHO 1

SEBOPEHO-PUO SA SESOTHO 2

Here's how to access them:

1. Download the Akello Reading App.
2. Search for the book you want.
3. Purchase or subscribe online.
4. Download the book

Enjoy reading offline anytime on the Akello App.


<https://library.akello.co/>

SCHOOL BOOKS

now available on the Akello Online Library!



MOB Kidds Edutainment




Across

- 6 Neho e hlaisang moeeng oa rona maikutlo a bongoana mabapi le Morena Molimo.(8)
- 8 Motho ea ileng a hlatsuoa 'me ea latolang pepeneneng thuto ea Kriste. (9)
- 11 Neho e re thusang ho fumana tse ka re halaletsang kantle ho kotsi ea ho ithetsa. (6)
- 12 'Mele le Mali a Morena oa rona Jesu Kriste. (9)

Down

- 13 Mokriste ea hanang ho mamela balisa ba behiloeng ka tsoanelo. (12)
- 1 Sakramente e hlakolang motho sebe sa tlhaho. (7)
- 2 Motho ea sa lumeleng ho Jesu Kriste, ea sa hlatsuoa (8)
- 3 Neho e re thusang ho tseba hantle hofeta linnete tse senotsoeng ke Morena Molimo.(10)
- 4 Neho e re latsoisang 'me e re ratisang tsa Molimo. (7)
- 5 Neho e re furallisang libe esita le tse nyenyane. (5,2,6)
- 7 Ea ileng a hlatsuoa, 'me ea hanang ho lumela 'nete e senotsoeng ke Molimo. (9)
- 9 Neho e re thusang ho bona thato ea Morena Molimo linthong tsohle. (5)
- 10 Sakramente e re nehang Moea o Halalelang le bongata ba lineho tsa ona. (5)
- 11 Neho e re thusang ho ba le mamello le cheseho mathateng a bophelo. (5)

Likarabo tsa Puzzle MOB 94-4648





TSA KEREKE

MAMI e etela lelapa

la Sefuthi

Tšeliso Thakholi

Rameea oa litho tsa Lelapa la Maoblata a Maria ea Senang Sekoli (MAMI), Bro. Thabiso Sephamola OMI o re litho tsa MAMI, baprista le bo borothoro ba Kopano ea Maobalata ba phetha thomo e tsoanang eo mohlomi oa Kopano, e leng Mohalaleli Eugene De Mazenod a ba romileng eona ea ho etela mafutsana, ho ba thusa le ho ba rapella.

O boletse tsena nakong eo litho tsa MAMI li neng li ete-tse le ho nehelana ka limpho tsa lijo lapeng la Monghali Albert Sefuthi tšebeletsong e bileng Masianokeng haufi

ho tla etsa ketso ea lerato le mohau ea ho tla fana ka limpho tsa lijo ho tsoa bote-bong ba lipelo tsa bona.

"Ke utloa ke thabile ha-holo haele mona le ile la khetha ho tla lapeng la Se-futhi ho tla etsa mosebetsi ona o babatsehang. E se e ka Morena Molimo a ka le ekeletsa haholo, kaha le le batho ba tsebang ho ithaba hore thomo ea Mohalaleli De Mazenod e phethahale ka moo a laetseng ka teng." O boletse joalo a bile a eket-sa ka ho kopa hore, kaha Lelapa la MAMI ke la bo-rapeli, ka mehla ha ba ntse ba rapela ba lule ba ntse ba hopola lelapa lena hore le hole le tle le tsebe ho tsoe-lapele ho phetha thomo ea morena Molimo ka moo a le

Maoblata ona a re bolella kamehla hore re tsoanela ho thusa ba hlakong, re ba etele le ho ba nanabeletsa letsoho." O beletse joalo a bile a phethela ka hore ha b'a tla lapeleng la Sefuthi ho tla fana ka limpho, empa ba boetse ba tli'o ho tla etsa thapelo le ho lakaletsa lela-pa mohau le mahlohonolo a tsoang ho Morena Molimo.

Lebitsong la Lelapa Mofu-mahali 'Mamphosi Mpho-si o lebohile ka mokhoa o khethehileng ketso ena ea MAMI ea ho etela lelapa, ho rapela 'moho le ho fana ka limpho. "Ka 'nete re leboha boikhathatso ba lona ka tše-hetso eo le faneng ka eona. Re leboha ha le ntse le re beha merapelong ka linako tsohle e le hore enoa abu-ti oa bo rona ea ntseng a sena bophelo, Morena Mo-limo a tle a mo thuse a fole." Ke Mphosi eo.



le Motebo oa Sepolesa oa Fight One ka la 22 Phato monongoaha.

Puong ea hae e manoni e matla o boletse hore MAMI ke lelapa la Maoblata le e ntseng hore e be hona le Kopano e bitsoang ea Mao-blata a Maria ea Senang Sekoli. "Ka hona MAMI ke Lelapa la Maoblata hobane Kopano ena ha hona moo e tsoang teng haese mala-peng a bo rona."

O boletse hore MAMI ke le-lapa le phelang motseng leo morero o moholo oa lona e leng ho phetha thomo ea Mohalaleli De Mazenod. "Ke kopa re rate lelapa lena hobane e hlile b'a rateha 'me Morena Molimo o ratile hore ba etse mosebetsi ona oa bona oa bo etela le ra-pella mafutsana." A leboha le ho thoholetsa MAMI ha ba ile ba ithaba ka ho tlohe-la mesebetsi eohle ea bona

rommeng ka teng.

Mookameli oa MAMI Mofu-mahali 'Mamosa Seoli o itse bona e le Lelapa la Maob-lata le phelang motseng, ba sebetse tlasa tataiso ea baprista le bo borothoro ba Kopano ea Maoblata, ka ho tsamaea metseng ho hloela bakuli le ho nka lipalo tsa motse ka mong hore na bakuli le batho ba hlokang ba kae. A re mosebetsi oa mantlha oa bona ke ho thu-sa baprista le bo borotho-ro ha ba ntse ba tsamaisa Sakramente e Halalaelang ho isa metseng, le bona ba 'ne ba e tse mosebetsi o mong oa ho hlokomela ba-kuli le bohle ba hlokang.

A re kamehla Morena Molimo o ba ruta hore ba lokela ho ratana joaloka-ha a ba ratile, "'me ra utloa hore re lokela hore re 'ne re tsoelepele ka eona taba eo. Athe ka lehlakoreng le leng

Thapelo ea Khotso

Oho Molimo oa toka le khotso, re hlonolofatse rona baahi ba Lesotho, 'me u re thuse ho phela khotso le leratong la hao.

"Morena, nketse mose-beletsi oa khotso ea hao. Moo lehloeo le leng teng, ke jale lerato. Moo batho ba fosetsaneng, ke jale tsoarelo. Moo lipelaelo li leng teng, ke jale tumelo. Moo batho ba nyahameng pelo, ke jale tšepo. Moo lefifi le leng teng, ke tlise leseli, Moo masoabi a leng teng, ke jale thabo. Molimo oa ka, etsa hore Ke se ipatlele ho tšeli-soa, ke mpe ke tšelise ba bang. Ke se ipatlele ho utloisisoa, ke mpe ke be ea utloisisang ba bang. Ke se ipatlele ho ratoa, e mpe e be 'na ea ratang ba bang, Hobane ke ka ho fana, re fumanang, ka ho tsoare-la, re tsoareloang. Ka ho shoa, re tsoalloang bophelo bo sa feleng.

Amen."

2025-2026 SELEMO A

SONTAHA SA 22 HAR'A SELEMO



Jeremia 22:19-7
Pesalema 62
Ba-Roma 12:1-2
Matheus 16:21-27



Khothatso

Tloha pel'a ka, Satane!

Thuto ea Morena oa rona Jesu Kriste e phuthetse mantsoe a mang ao re a balang re sa a hlokomela, athe ke a bohlokoa. Evangelii ea kajeno e na le mantsoe a mofuta ona, a kang ana: motho a itele, a jare sefapano sa hae; ea ratang ho pholosa bophelo ba hae, ho tla mo lahlehela; athe ea lahleheloang ke bophelo ba hae ka baka la Kriste, o tla bo fumanana.

Mantsoe ana, leha a re khopisa kamoo a neng a khopise Peterosi kateng, leha re a talima e le mantsoe a bohlokoa, ke mantso a bohlokoa; re sitoa hoa hlakola evangelii, hobane ha a le sieo, bophelo ba rona ba sekriste bo ka holofala. Ho ba mokriste hase ho ea Kerekeng ka Sontaha feela, ho ipolela le ho amohela, ho bala rosari, ho roala setšontšo le ho ntša chelete ea koleke ka botšephehi. Kriste kajeno o re fa matšoao a mabeli a mokriste oa 'nete: oa itele 'me o mo sala morao a jere sefapano.

Jesu o re bolella hantle, o re: "Ha motho a rata ho ntšala morao, a jare sefapano sa hae." Sefapano ke ntho e nkutloisang bohlokoa bophelong ba ka. Motho e mong le e mong o na lifapano tsa hae. Lifapano tsena ha li tsoane e mong le e mong o na le tsa hae, tseo a lokela ho li jara ka botšephehi: ekaba ho hloka bophelo, kapa litsietsi, likotsi, likhathatso tsa mofuta-futa lapeng kapa mosebetsing; ekaba mathata, ho etseletsoa ka ba bang, kapa ho ba le molekane, mookameli, kapa mohahisani, eo re sitoang ho utloana le eena; le teng ekaba litšekamelo tsa rona: bohlae, botsoa, mona, boiphetetso, kapa hape likhaello tsa batho bao re sebetsang kapa re phelang le bona, ba se nang boikarabello 'me ba re behang tsietsing.

Lifapano li ngata haholo. E mong le e mong oa rona a ka leka ho lokolisa lenaneho la lifapano tsa hae. Tsoanelo ea rona ke ho amo-hela mathata ana a bophelo ka pelo e tsoeu ka thabo le ka botšephehi. Moleko o hlakhang ha ngata ke ho belaela ka lifapano tsena ka hore li boima ho feta tekanyo, re li bapisa le tsa ba bang, re rata ho tlohella tsa rona le ho jara tsa ba bang.

Tsela ea leholimo e feta ea Kalvaring. E mong le e mong o tsamea ka eona a ntse a jere sefapano sa hae, seo a tla thakhisoa ho sona, seo a tla shoela ho sona, empa sefapano sena sa rona se tla fetoha sefate sa bophelo 'me se tla re pholosa.

Jesu o tsoela pele o re: "Ha motho a rata ho ntšala morao a itele." Ho sala Kriste morao ke ho ba morutuoa oa hae. Ha re sala motho morao, re tsoanetse ho nka tsela eo a tsamaeang ka eona, o tsamaea ka mokhoa oa hae, botleng le tsietsing, hara pula kapa har'a mochoso, re phela kapa re kula.

Re sitoa ho sala motho morao re sa itele, hobane maikutlo a rona ha a tsoane, 'me kamehla thato ea e mong e tsoanetse ho suthela ea e mong sebaka. Haholo, re sitoa ho sala Kriste morao re sa itele, hobane Kriste, leha e le motho, ke Molimo, 'me litsela tsa Molimo li fapane le tsa batho holo.

Peterosi ea neng a itlamme ho sala Kriste morao, o n'a fumane botha bo boholo, hobane Jesu o n'a tsamaea ka tsela eo a neng a sa e rata, a sa e utloise. Ka letsatsi le leng Jesu a ba a tlameha ho mo khalemela habohlolo, a re ho eena; "Tloha pel'a ka, Satane; ua ntšit-tsa; hobane ha u hopole tsa Molimo, u hopola tsa batho."

Jesu o n'a itokisetse ho utloa mahloko a mangata, ho jara sefapano sa hae le ho bolaoa, athe Peterosi o n'a re ho eena: "Ntho tse joalo li se ke tsa u hlakela." Bophelong ba rona bohle re tla tlameha ho khetha pakeng tsa mehopoloe ea Molimo le mehopoloe ea batho, thato ea Molimo le thato ea rona.

Ka ho lumela ho lekoa ke Satane feeleng le ka ho ba litlallong se-rapeng sa Gethsemane, Jesu o re rutile bophelo ba rona ka nto, ke boikhethelo bo sa feleng pakeng tsa tsela ea Molimo le tsela ea rona, mehopoloe ea Molimo le mehopoloe ea rona, thato ea Molimo le thato ea rona.

Ha ho motho ea ka salang Kriste morao a sa itele. Ha re mo latela ka botšephehi, re tla ikutloa ka mohlomong hore re senyeheloa ke bophelo ba lefatše, re hloleha nthong tse ngata, batho ba re tšeha, re utloa bohlokoa ha ba bang ba phela hamonate, ba iketla. Empa Jesu o tiisa hore ea lahleheloang ke bophelo ba hae ka baka la ka, o tla bo fumanana.

Ha ho le joalo, re se ke ra ipeha tsietsing ea ho lahleheloang ke leholimo ka ho tsamaea ka tsela eo re ikhethelang eona. Ea tsebang tsela ea leholimo, o mong ke eena Kriste, ea itseng "ke 'na tsela, 'nete le bophelo." A re mo salang morao ka botšephehi. Re ke ke ra lahleha. Morena ke molisa oa ka, ha ke tšabe letho.

Bahalaleli har'a Beke

31	Phato	Amatus
1	Loetse	Verena
2	Loetse	Elias
3	Loetse	Monica
4	Loetse	Hermes
5	Loetse	Sabina

Na LDF Ladies e tla finyella?

Tšeliso Thakholi

Leha sehlopha sa bolo ea maoto sa basali sa LDF Ladies se bapala bolo e tsoileng matsoho, ho tloha ha e qala litlholsano tsa Mohope oa CAF Women Champions League ho bonahala ho ntse ho le moepa, ho nyolosetsa ho sona ho hapa lipapali, kaha se lahlehetsoe ke lipapali tse peli ka tatellano ka ho sasaroa ke Gaborone United ka 2-1 le ZESCO Ndola Girls ka 1-0 lebaleng la Gaborone United mafelong a beke a tsoa feta. Na LDF Ladies e tla finyella ho makhaolakhang?

Mokoetlisi oa mehleng oa LDF Ladies Monghali Lehloenyane Nkhasi o ne a ile a bolela pejana sehlopha se tloha hae, hore ha se ke sa sebetsa ka matla Gaborone United e tlii'o itsamaela bolacha lihlopheng tsa Mokhahelelo oa A. A boela a hlokomelisa sehlopha hore Mokhahelelo oa A oo ba leng ho ona ba se ke be ba halala ZENESCO Ndola Girls le Herentals Queens, kaha ke lihlopha tse kotsi haholo. A tiisa hore haeba LDF Ladies e itokisitse ho lekana e tla sebetsa hantle, empa lintho li mafeke-feke ho moepa ho oa nyolosetsa.



Sehlopha sa Gaborone United ho bonahala e le se seng sa lihlopha tse hlirisang lihlopha tsa Lesotho, kaha ngoahola ke sona se

ileng sa khakhatha Kick4Life Ladies 10-1 lipapaling tse tsoanang. Ka nako eo Kick4Life Ladies e ne ena le libapali tse kotsi haholo,

tseo boholo ba tsona li neng li bapala sehlopheng sa naha sa Mehalalito.

Leha sehlopha sa LDF Ladies se bapala hantle ka-

hare ho leballa le barati ba bolo ba khotsofetse ke tsela eo se ntlafalitseng papali ea sona ka teng, empa se hlokalahalang hore mokoetlisi a se lokise ke ho hlaba lintlha le ho se nyahame kapele ha se qala se hlajoa ntlha pele. Taba ena ea ho hloloa ke lipapali tse peli ka tatellano, leha e le ka lintlha tse nyanane, ha e'a tsoara Basotho hantle ho hang ho latela ka moo e bapalang hantle ka teng Liking e Kholo ea hae koano.

Ho feta mona boholo ba sehlopha sa LDF Ladies bo bopiloe ka libapali tse bapalang sehlopha sa naha sa Mehalalito, li bile li ena le boiphihlelo papaling ea bolo le ho bapala lipapali tsa machaba. E be bothata bo ho kae? Ke potso eo Basotho ba ntseng ba ipotsa eona. Ho fihlela hajoale LDF Ladies e se e saletsoe ke papali e le 'ngoe khahlanong le Herentals Queens e le hore e tsebe ho khutlela hae.

LDF Ladies e maemong a boraro kamor'a ho hloloa lipapaling tse peli tseo e seng e li bapetse, ea hlaba ntlha e le 'ngoe, ea hlajoa lintlha tse tharo 'me haena letho ka mokotleng. Sehlopha se lihulang pele Mokhahelelo ona ke ZESCO Ndola Girls ka lintlha-kholo tse tšeletseng ka mokotleng bobeling ke Gaborone United le eona ka tse tšeletseng.

Lerotholi o fanyeha lieta

Tšeliso Thakholi

Sebapali sa mehleng sa Sehlopha sa Naha sa Likuena e bile e le moetapele oa nako e telele oa sehlopha sa LMPS 'Semonye', Nkau Lerotholi o behile meja fatše papaling ea bolo ea maoto. Sena se tiisitsoe ke Raliphatlatso oa LMPS, Monghali Lekhooana Lekhooana puisanong le Koranta ena, moo a bontšitse hore o ntse a le teng kahare ho sehlopha, kaha a ntse a ithuta tsamaiso litabeng tsa bokoetlisi.

O itse khalala ena ea bolo ea maoto o qalile leeto la hae la bokoetlisi ngoahola ka ho fumana Lengolo la C Licence ho tsoa ho Mokhatlo oa Lesotho oa Bolo ea Maoto (LeFA). A re har'a libapali tseo ba kileng ba eba le tsona kahare ho LMPS, ke se bapali sa pele se hloahloa se kileng sa mamelela le ho tiisetza nako e

telele ho fihlela a beha meja fatše, "a ntse a ena le lerato le tibeling ho LMPS FC."

A supa hore ka 'nete ba khotsofetse haholo ke tsela eo a sebelelitseng sehlopha sa habo ka boitelo le ka lerato ka teng. "Ho latela ka moo a sebelelitseng sehlopha sa LMPS ka teng, re ne re utloa e ka nako ea hae ea ho phomola e ka se fihli, empa joale lilemo tsona ha li mo lumella, ha li re a phomole o tla lokela ho phomola." O boletse joale a bile a phethela ka ho leboha tšebetso ea hae e tsoileng matsoho le ho mo lakaletsa katleho le mahlohonolo ka linako tsohle.

Kakapa ena ea bolo ea maoto ke letsoalloa la Nazareth tikolohong ea Roma, 'me o qalile talenta ea hae ea bolo ea maoto sehlopheng se senyenyane sa Matlama ka 2007, moo a hlileng a ipabola ho fihlela a fetela ho se sehlo. H'a se a le ho se sehlo o ile a khethoa ho ba moetapele (Captain) 'me ke hona nakong eo a ileng a ea leka lehlohonolo ka ho

ea litekong sehlopheng sa Garankuwa United ka 2014, 'me h'a khutla teng ka 2015 a titimela sehlopheng sa LMPS 'Semonye' ho fihlela kajeno.

Sehlopheng sa naha o

bapetse lipapali tsa mehope e mengata haholo e kang ea AFCON le COSAFA, moo a ileng a kenya letsoho le toma ho bona hore sehlopha sa habo se sebetsa hantle. Papali ea hae ea ho

qetela ea selemo sa lipapali sa 2025/2026 sehlopheng sa LMPS ke ea Liki moo LMPS e ileng ea bapala le Bantu ka seahlolo sa 1-1. O sebelitse ka thata ho bona hore sehlopha se phethela lipapali tsa sona tsa ngoahola se le boemong ba leshome lokong.



Likuena lebaleng la Toyota

Tšeliso Thakholi

Mokhatlo oa Bolo ea Maoto oa Lesotho(LeFA) o fihletse tumellano le oa Bolo oa Afrika Boroa(SAFA) ho sebelisa lebala la lipapali la Toyota, Mangaung ha e tla be e amohela sehlopha sa Atlas Lions ea Morocco bakeng sa papali ea pele ea lehae ea AFCON 2027, e tlang ho ba ka Labobeli la la 29 Loetse monongoaha, moo barati le batšehetsi ba bolo ea maoto ba lebelletseng ka thahasello e kholo hore Likuena e tla sebetsa hantle.

Likuena e ntse e le karhar'a linaha tseo mabala a tsona a naha a sa fihleng maemo a CAF a ho tšoara lipapali tsa machaba. Sena se latela phatlalatso ea morao-rao ea mabala a lumelletsoeng ho tšoara lipapaling linaheng tsa Afrika. Ho sa le joalo, Likuena e hlile ea ipehela sebaka linaheng tsa Afrika kamor'a ho hlola Seychelles ka kakaretso ea 2-1 papaling ea pele ka Tlhakubele 2026, ea

bapala ka ho lekana le eona ka 0-0 Mangaung.

E tla qala letšolo la bona la lipapali tsa AFCON 2027 Sehlopheng sa A ka ho elata letailane ho ea bapala le Niger pele ho papali eo ba tlabeng ba amohela Morocco, e seng e tsoa khutla lipapaling tsa Mohope oa Lefatše monongoaha. Lipapali tsa machaba tsa AFCON 2027 li tliil'o bapaloa matsatsing ao FIFA e but-seng fenstere, bakeng sa ho khfutsa ha lipapali tsa liki tsa linaha ho tloha ka Loetse monongoaha le ka Tlhakubele 2027.

Lihlopha tse peli tse ka holimo ho tsoa Mokha-hlelong ka mong li tla fetela litlholisanong tsa ho qetela tsa AFCON 2027 tse tliil'o

tšoareloa linaheng tsa Kenya, Tanzania le Uganda. Naha ea Lesotho e Mokha-hlelong oa A moo e tlang ho bapala le Morocco, Gabon le Niger.

Sehlopha se sireletsang Mohope oa AFCON bakeng sa 2027 ha ho e-s'o hlake hantle hore na ke se fe kamor'a manyofo-nyofo a ileng a etsoa ke Senegal, 'me ea amohuoa mohope oa fuoa sehlopha se neng se hlaha boemong ba bobeli e leng Morocco. Senegal e ile ea nka boipiletso ea hlahlela nyeoe ea eona Makhotleng a Linyeoe, moo e ntse e-s'o ahloloe. Ka hona hajoale Morocco e nkoa e le eona e leng bompoli ba 2025 ho fihlela Makhotla a fane ka kahlolo.



Ha kea khotsofala-Mojakhomo

Tšeliso Thakholi

Mokoetlisi oa Sehlopha sa Bolo ea Maoto sa Members, Katiso Mojakhomo o re leha ho lahleheloa ke papali e se ntho e monate, empa hona le matšoao a khotsofatsang ao bahlankana b'a bontšit-seng ao a tliil'o tsoelapele ho oa matlafatsa e le hore ba tsebe ho tla hapa lipapali tsa bona tse hlahlamang. O buile tsena kamor'a ho sasaroa ke Matlama ka thu-

pa ea 3-0 papaling ea pele ea liki e bileng Lebaleng la LCS, Maseru, ka la 24 Phato monongoaha.

Mojakhomo leha a bile sechele ho bolela matšoao ao a reng o tliil'o a matlafatsa ka le reng o tšaba ho phetlela mohatla oa nku masholu, o boletse hore se-sosa sa hore e be ba ile ba lahleheloa ke papali eo ke ho lebala ho tsepamisa maikutlo papaling, e leng tse ling tsa lintho tseo a seng a qalile ho sebetsana le tsona ka matla a maholo. O re taba e 'ngoe e bile boleba, kaha

a ne a ba boleletse hore ba se lumelle Matlama ho laola bolo mpeng ea lebala, kaha e le hona moo e batlang e le kotsi haholo, "empa ho bonahetse ba lebetse ke ha ba tla fumana monyetla oa ho hlaba lintlha."

O boletse hore tahlehelo ena hae bolele hore e se e le sona setšoantšo seo ba tliil'o sebetsa ka sona joalokaha batho ba bang ba ka nahana joalo, empa ke hona ba ntseng a sebetsana le mahlakore ohle a ka lebaleng a kang a ho tšireletsa moleng o kamorao, o

bohareng le mokhoa oa ho hlaba lintlha. "Re na le lintlha tse ka lokisoang tseo ke nang le tšepo ea hore ha li ka loka re ka tseba ho hapa lipapali tsohle tsa rona." A rialo.

O re ntho ea mantlha ea bohlokoa eo a lokelang ho tla sebetsana le eona ke hore sehlopha se sebetse e le ntho e le 'ngoe nakong ea papali, e leng eona e batlang e haella haholo. A qetella ka hore ka papali ena ba bone boholo ba lintho tseo ba lokelang hore ba li lokise bakeng sa lipapali tse tlang.

Haele mokoetlisi oa Matlama, Monghali Thabile Secker o itse o khotsofetse haholo ke tsela eo bahlankana ba bapetseng ka teng, 'me tlotla le teboho li lokela hore li lebisoe ho bona ho ba tse ling tsa lintho tseo ba neng ba ntse ba li etsa ho ithlhophele papali ena ba li ntšitse li ntse li le joalo, le hoja ho ntse ho hloka hore ba lokise mona le mane. "Ho ea pele kea kholo re tla lokela ho phahamisa ho feta mona e le hore re tle re tsebe ho tla le ntlha tse ling hape." Ke Secker eo.

Ho sa le joalo, lipapali tse ling tse qalang tsa liki ke moo letsatsing la Moqebelo Lioli e ile ea bapala ka seahlolo sa 2-2 le LDF, bompoli ba Liki e Kholo e leng Lijabatho ba teteka sehlopha se secha sa Mzane ka 8-0, LUFC ea bapala mokhekhetho oa 1-1 le Lifofane ha Linare e ile ea hlola LMPS ka 3-1. Ka Sontaha Manonyane ea bapala ka ho lekana le Bantu ka 3-3, Machokha ea hloloa ke LCS ka 2-1 ha Majantja e ile ea tsoa ka lesoba la nale ha e ne e shapa Villa ka thupa e bohlokoa ea 1-0.

